



平家文集

十九之十一

内閣文庫			
番 號	漢	10277	
冊 數		12 (8)	
函 號	國	3	1



国立公文書館
National Archives of Japan

原本の文字など不明瞭な個所があります。

綴じ部(喉部分)の文字など不鮮明な個所があります。

齊文集卷第十九

外制三

倉部郎中林清之除直寶章閣都大

治制

勅具官某蓋聞有道之世地不愛寶比鍾官之課
不登非地寶嗇耶抑裕之惟人爾通練敏劭治郡
有善狀九府圜法泉布爲重輟材星省徃幹東南
三品之產轉嗇而爲豐賈誼有言上挾銅積以御
輕重錢輕則以術斂之重則散之貨物必平朕有
望於汝矣可

黃浮權知建寧府制

勅具官某建安富庶文物之邦比歲不登糴踴而
民易動遺朝廷憂故擇守良難爾審機於應物迎
刃於制事咸以材屬駕輶漕粵易轍殿閤人宜其
官何嫌改令夫鎮危疑之情活彫瘵之俗固守職
也握苗常患於助長種木亦忌於太恩行所無事
而不求赫赫其吏治之良乎可

戶部侍郎京湖制置使史嵩之除權兵
部尚書制

勅朕仰稽韓奕江漢之詩俯考皇武方城之雅嗟
古風之寢邈睠王事之良勞擢繇外聞之崇列在
中室之峻有華從橐宜錫書官某廷秀明

出可將略審刺虎之勢必威厲身為身才才勇勇之
機雖會戎而不憚震威聲於垂瓠褫營魄於穹廬
珍奇之灰既空冒頓之鏑遂絕圖八陵而效捷固
知天道之還告九廟以歸功亦賴人謀之贊肆嘉
乃志式獎爾庸躋文昌八座之聯攝司馬五兵之
柄維時眷遇允謂遭逢豈不懷歸而畏簡書既舉
勞還之典乃使帥屬而平邦國尚修獻愷之儀可
大理少卿趙與芮除寶文閣待制提舉

佑神觀仍奉朝請制

勅龜鈕藻衣甫奏平反之最翠綏王佩趣躋次對
之聯匪親愛之私恩實榮懷之彝典具官某暉承

霄極秀挹天潢性行忠和踐丞郎而養望材節通敏歷卿監以蜚聲朕觀葛藟之綿綿嘉棠棣之韡韡久恬於進宜峻其遷延閣陞華儼荷囊而待問真庭均逸樂戲綵以承顏益隆信厚之風茂對熾昌之嘏可

辛克承除直顯謨閣主管紹興府千秋鴻禧觀制

勅具官某兼葭蒼蒼白露爲霜世道不競人材老於摧折者何可勝數爾以練達之材精密之識屢更事任具著勞効意所不合翩然駕飛鴻而獨往不計搖落之幾秋也朕厲精求治亟

看哲而

之則以病論豈遂忘斯世乎寶奎寓

養心

尚識予遡洄之意可

張洽除直祕閣主管建康府崇禧觀制勅具官某兼葭蒼蒼白露爲霜世道不競人材老於摧折者何可勝數爾以簡澹之姿明遠之識嘗於撫字關決見其材意所不合翩然駕飛鴻而獨往不計搖落之幾秋也朕厲精求治亟起耆哲而用之則以病論豈遂忘斯世乎祕廷寓直間館養恬尚識予遡洄之意可

宗正少卿張嗣古除祕閣修撰樞密院副都承旨制

勅具官某朕長馭中原樞掾皆得以與聞廟筭矣
導宣密命日與柱下史並直文塲爲最近爾識照
未然之機材擅有用之器曩記言于朝國勢虜情
論建甚悉恨不果用也白首重來識益定材益老
其以中祕論議參承宥密制勝之略保大之謀凡
可以贊吾樞紐者毋懲毋忽可

太宗正丞兼兵部郎官謝奕禮除將作
少監制

勅具官某右賢左戚國之令典戚且賢褻進可後
乎爾端良而敏英潤而澤芝輝玉映有文靖故家
之風度宜不爲流水游龍而移攝如

幾堅貳

非朕之私戚而賢也其靖共爾位

加來

福可

太府寺丞陳韞除太宗正丞制

勅具官某綿綿瓜瓞本支百世必屬近行尊者訓
齊之而丞以庶姓春秋公族大夫之意也爾穎然
處囊之錐恢然發硎之刃而退然不自暴涵負蓋
遠庀屬外府藉甚有聲董治太宗勉贊而長朕之
進用爾者此其階可

副都承旨張嗣古除右文殿修撰權知
建康府江東安撫制

勅具官某秣陵槃槃一都會進可以控中原朕方

規復輿圖思得魁壘俊偉之彥付以留籥爾起自
久間入對便殿敷陳攻守大要具有顛末擢承密
旨出揔陪京卹民以厚根本厲兵以壯形勢鞏護
天塹應接汴洛地以人重毋謂事權之非昔也祕
殿論譔姑華爾行有功見知顯拔未艾可

張元簡除太府寺丞制

勅具官某士君子知用舍有命行藏有義則身可
屈氣不可折爾軒岸而閎偉任重器也荆門城築
之役平板榦程土物其成不愆于素如楚艾獵民
方便安之遽掣其肘而去身雖屈其氣全矣起之
家食丞于外府朕蓋以是爲事任之諸可

曾天麟除浙東提舉常平公事制

勅具官某朕親政以來諸道部使者選必精察必
謹欲光華之被原隰也爾名家之彥周行之翹穎
知朕德意志慮蓋熟左浙庾臺往將使指維昔先
朝有疏曹娥斗門洩鑑湖入江而田不病民至今
德之非爾祖也耶遠乃猷裕乃以民寧毋徒曰山
海之藏足以利吾國可

僉書樞密院事鄭性之贈三代

故曾祖可大贈太子少保制

勅朕儀圖近弼招選譽髦自竒童而升如天聖之
晏殊由倫魁而進如端拱之蒙正蔚扶輿之鍾粹

侈演迤之儲祥榮燭九原寵延三世具官某故曾祖具官某隱居求志積善在身無言不酬著在鄉評之望非禮勿動形爲家法之傳軸雖折於壯齡榦實培於慶裔予倚西府邇臣之重爾登東宮亞保之崇祇服襚章茂綏廟祀可

故曾祖妣陳氏贈咸寧郡夫人制

勅豫章生於鄧林璆琳出於元圃積深蓄厚則發之遠推高原大則報之隆具官某故曾祖妣某氏嫠居而肅於齊家約處而豐於教子惠來師友燕及孫曾覩警悟之姿則愛鍾于心聞弦誦之聲則喜動於色成茲國器翊我政樞雖八柱明堂不及生前之見而六瑚清廟竟爲身後之光肇開湯之封增賁烝嘗之祀尚其不昧歆此殊榮可

故祖獎贈太子少傅制

勅叔虞之唐必興畢萬之魏必大何天道之應若券劑以取償蓋人事之修猶耒耨而望穫欲驗孫謀之遠盍觀祖澤之休具官某故祖某穎悟秉姿淹該進學文從字順勇追賈馬之風墨妙筆精雅得鍾王之法方賢哉之騰譽胡逝者之興嗟不在其身克昌厥後繫我弼諧之助皆而講習之傳官傳參華起英魂於既往泉扃增耀垂景祐於方來可

故祖妣陳氏贈齊安郡夫人制

勅上推乎八世者康成之先下占乎五世者有媯
之後矧王母誨言之未泯而聞孫承弼之方新肆
加告第之恩庸表起家之慶具官某故祖妣某氏
坦直無隱靜間有儀奉事嫠姑動不違於四德扶
携幼子守益厲於三從斷機之教既嚴含飴之愛
更切受茲介福發爾幽光文軒象服之華懿典蜜
章之寵懿魂如在尚克饗之可

故父汝永贈太子少師制

勅爲人君止於仁而仁莫宏於錫類爲人子止於
孝而孝莫盛於揚名朕博求開物成務之材以濟
修政攘夷之治隆樞廷之眷倚侈禰廟之褒崇具
官某故父具官某蹈道有常秉德無競周旋鄉黨
寬洪長者之風盤礴丘園正潔幽人之操念義方
之爲訓豈科舉之徒文凡一時師友之功必千古
聖賢之蘊晁董公孫之對固有源流益稷皐陶之
謨正資羽翼佩一經而追往撫三金以興悲欲慰
孝思可稽懿典超進宮師之亞增光家學之傳式
勸教忠毋忘垂裕可

故母碩人黃氏贈宜春郡夫人制

勅袞衣而感蓼莪不如戲綵之爲榮鼎食而悲凱
風不如負米之爲樂矧乃三遷之訓成予四輔之

賢且沛恩榮用紆孝慕具官某故母某氏夙姿警慧素履靜柔佩悅奉姑修婉容而特謹傾奩教子揭懿範以尤嚴迄培隆棟之材克贊改弦之化流徽無斁鍾慶有源幾年馬鬣之封一旦魚軒之錫德無不報魂尚知歆可

故妻碩人潘氏贈清河郡夫人制

勅碩人其願必稱厥德君子偕老誰無此心同甘苦於隱約之秋異幽明於顯融之日有懷契闊曷尉欷歔具官某故事某氏生自名門儼于魁彥淑均接下佩纓奎芷之芳雖肅奉先錡金藻蘋之潔推舉按齊眉之意致趨機斷織之規生資助以居多歿追榮而宜厚委佗象服首正小君之封積累鵲巢益綿奕世之慶可

直華文閣知江陵府楊恢除知襄陽府
京西安撫副使時暫兼京湖制置司公
事制

勅具官某荆襄自昔衿喉之地吾國之上游也師以進爲功故襄陽視荆南爲尤重爾雋偉而有志莊靜而有謀頃上邊最擢帥于判事任蓋重矣王師方向河洛俾爾擁旄進屯于襄任又加重望隆中而懷葛亮眺峴首而慕羊祜臨江漢而思召虎積穀練甲控扼險要使前茅無後顧之憂首尾有

相應之勢而吾之取中原可以萬全時乃功可

尤熈除直秘閣權知江陵府兼主管湖北路安撫司公事制

勅具官某荊州用武之國東連吳會西通巴蜀而北控京洛經理中原之秋宅乃牧尤難其人爾涉深而養之固蓄厚而發之閑太阿龍泉之出匣斷蛟刺犀忽若筆泛豈安陸專城足以展其材寓直中秘全護荆楚觀三國必爭之形勢考羊陸守禦之規摹熊臥虎視精神折衝上流之顧寬則朕可安意而圖中原矣往懋厥功用副推擇可

知吉州劉煒叔職事修舉特轉奉直大

夫制

勅具官某漢二千石有治理効輒爾書勉厲增其秩故良吏爲盛朕甚慕之爾處已靖莊待民樂易所至有漢循吏之風茲守廬陵政平訟理田里安其條教而灌輸章貢以戢蠢動曾靡告勞休問達于朕聽久矣奉直必實歷七年乃轉優於勸不汝靳也其益勤弗懈以需選拔可

范炎辭免赴都堂審察特轉承議郎與

宮觀制

勅具官某高帝有尊顯賢士之詔而魯兩生不至朕收攬衆正如茅斯拔爾顧安貧樂天不屑弓旌

之招易所謂履道坦坦幽人正言非耶進秩賦祠
姑遂雅志病愈造朝尚其有待可

葉武子辭免召命特落致仕除直祕閣
主管華州雲臺觀制

勅具官某元祐間文彥博既老復與大政范鎮既
老不復來亦各行其志也爾少而立壯而仕有聲
老而知止不殆良可嘉尚朕求士如渴起之垂車
志益堅節益固可以媿鐘鳴不休者寓直祕丘賦
廩祠館貪賢重老之意尚懋承之可

劉福轉武德大夫制

勅具官某鵠鶴魚龍征行方銳犀渠鶴膝製作宜
精嚴除上功謂爾舉職進官一列用勸只勤可

高之問除直祕閣主管亳州明道宮制
勅具官某人之止以久爲難節或移於晚守或失
於終此良之上九所以爲止道之至善也爾姿簡
澹而踐平易用不盡材渺送目於冥鴻之表光生
德宇之泰定坐閱物華之變遷時可以行猶堅卧
而莫起其良止之至善者乎尾眉華髮與汗漫游
命職賦祠用資晚節可

知樞密院事喬行簡贈三代

故曾祖勝之太保贈太傅制

勅朕惟有維師尚父則成變伐之功有元老方叔

則建中興之業延登壽俊坐筦決樞備殫啓沃之
忠宏濟規恢之治垂休亡斁開迹有源具官某故
曾祖具官某琮璧粹溫笙鏞淳古左圖右書之外
一泯行藏仰事俯育之間兩無愧怍克篤曾孫之
慶肆躋近弼之聯申錫恩章誕揚愍冊拜王祥之
秩夙敷賁於泉扃進卓茂之官益寵綏於廟祏尚
其冥漠同此榮懷可

制
故曾祖母孫氏婺國夫人贈越國夫人

勅形大者聲宏膏沃者光燁爲仁雖在於一日之
頃積德實計於百年之餘睠華髮之元龜兆中興
之治象遡求慶派申賁曾闡具官某故曾祖母具
某氏淑謹飭躬惠和逮下于沼于沚克勤錡金之
共宜室宜家允穆琴瑟之好積自一門之懿流爲
三卅之昌地靈有開天報不爽小君都號夙臨婺
女之區大國進封肇啓會稽之壤歆我漏泉之澤
揚而奕葉之休可

故祖堯太傅贈太師制

勅素安之爲太尉自良而傳陳群之錄尚書由寔
所積寸雲足以興泰山之雨勺水足以導黃河之
源方倚重於中樞宜追榮於先廟具官某故祖具
官某家庭肅穆鄉黨雍和機械俱忘忠信之寶獨

富胼脾不鑿仁義之爵尤尊篤生萬石之孫坐幹
五兵之柄推功祖澤錫命師垣雖聲迹已陳何施
靈壽之杖而典刑具在不愧進賢之冠祗服予恩
永綏爾祀可

故祖母杜氏慶國夫人贈益國夫人制
勅樂莫樂於抱孫榮莫榮於尊祖况樞機周密特
重舊臣之圖而源流深長實受王母之福欲報含
飴之德可稽刻蜜之章具官某故祖母具某氏婉
婉令儀幽間懿行受蔭蘭而獻常存起孝之心采
蘋藻以承益秉有齊之念培本根而燾後茂枝葉
以光前積累既豐襲崇亦腆彤管有煒旨開慶永
之封象服是宜易胼岷山之壤紆悲霜無祉雲
仍可

故繼祖母蔣氏華國夫人贈吳國夫人
制

勅有孚而它吉者人事之當修積善而餘慶者天
理之必應欲驗自葉流根之澤當觀歛華就實之
功具官某故繼祖母具某氏冲靜以和嫺柔而度
三遷教子未酬志士之懷萬卷詒孫遂享真儒之
効惟股肱之寄甚重故體貌之恩特隆延及重闈
均加襁褓典旌周公之遠裔既盛笄珈相太伯之名
邦更豐湯沐信在天之可恃宜奕世之知榮可

故父森太師追封寧國公制

勅四海之福君明而臣良一家之慶父慈而子孝
瞻言耆俊服在大僚上應極樞星紐之光散爲天
街析木之潤增彊吾國用顯其親具官某故父具
官某明善而誠身弼中而彪外學貫穿於千古獨
得其宗氣充塞於兩間莫窮所養培經畬而遺子
拓文苑以傳家成茲儒英爲我國鎮高車駟馬雖
不覲於生前衮冕植圭果有開於身後侈赫赫南
山之望啓槃槃北地之封庶可作於九京尚克昌
於百世可

故母俞氏福國夫人贈魯國夫人制

斯松產於祖徠而充棟梁桐生於嶧陽而中琴瑟
蓋稟鬱積蜿蜒之氣乃成光明俊偉之材匪施告
第之恩曷顯擇鄰之教具官某故母具某氏姿涵
圭璧行中準繩夙夜組紉恪謹女功之習春秋錡
宮祇勤婦德之修旣舉按以賓夫又斷機而訓子
及今熾艾念昔劬勞幼學而壯欲行豈爲萬鍾之
奉欲養而親不逮空懷三釜之悲尉孝慕於寒泉
拓恩封於曲阜懿魂如在休命知歆可

故妻呂氏安定郡夫人贈東陽郡夫人制

勅宋啓皇圖呂爲望姓贊太平之治則蒙正夷簡

輔更化之功則公著大防迨南渡之徙都盛東陽
之占籍世傳雖遠家法猶存既有名儒以昌斯文
又有賢女以相君子具官某故事妻具某氏性姿媚
澹襟度冲夷誦內則之篇佩左紛而克謹玩家人
之卦主中饋以尤嚴宜爲偕老之期俱享鼎來之
慶胡先朝露莫共歲寒拱木參天護泉臺之佳氣
胎田易地聳鄉國之榮觀可

故繼妻樓氏譙郡夫人贈吳國郡夫人

制

勅魯公有令德之妻韓侯有燕譽之婦惟宜家而
得助斯與國以同休倚嗟契闊之情於亦便蕃之
滙具官某故繼妻具某氏備英顯胄配德名門禮
法周旋凜若惠昭之訓詩書薰染粲然道韞之風
居既定於鵲巢進方偕於鴻漸命胡不淑生遽有
涯易譙城之故封斥茂苑之古壤增華窀穸永燕
丞嘗可

趙應愚轉保義郎制

勅具官某王后六服周主以奄女御及奚實從其
役爾爲胥史亦旣竣事一秩酬勞當思自勉可

王珪轉武顯大夫制

勅具官某西洛歸疆已奏三京之捷東淮平寇猶
論一壘之功爾於是行嘗奮其勇升四階而示勸

總尺籍以知榮可

繆夢達轉武德郎制

勅西洛歸疆已奏三京之捷東淮平寇猶論一壘之功爾於是行嘗效其力疊進官而示賞雖去職以知榮可

林演權知德安府制

勅具官某黃霸爲廷尉正數決疑獄廷中稱平至守潁川其治遂爲天下第一爾以內寬外明嘗允屬棘寺不阿不縱鉢之以禍福不顧起家景陵宜其政平訟理而民無愁歎也安陸爲湖右重鎮往而藩條能推所以治景陵者治之根本強以保障臣懋之哉可

李煒知崇慶府制

勅具官某西南六十州惟唐安以蜀名最古且阜陵潛藩也不輕授爾篤厚不欺慈祥有則分符天彭制閩以實政上旣增秩矣茲以蜀辟將又觀實政焉朕厲精更始以來寬卹之詔屢下賦欲簡刑欲平政令欲信莫非實之尚州縣吏能勤於奉詔澤安有不下流者哉其典聽朕哉可

吏部侍郎鍾震除寶文閣待制知太平

州制

勅大江以東姑孰爲重

先朝建侯植屏莫非雞

翹之英近世為人擇官未免龍斷之賤迨改弦而更始每弄印以束求得諸小宰之聯付以鉅藩之寄具官某家傳正大躬踐和明華國鴻文駢轡常揚之上沃君讜論頡頏褚馬之間顧朝望之方穹胡民庸之自詭貪賢良切申諭莫留擢升次對之華往膺共理之重周行十五年之久曾不磷緇漢守二千石之真何難鎮撫維川澮浸淫之後加田閭惟剝之餘正藉循良爲甦凋瘵風規汲黯諒無薄淮陽之心事業周瑜尚識屯牛渚之意勉圖治最入告嘉猶可

將作

監辦災禮除大理司刑

勅具官某朕篤方回氣之愛必試之公是之棘卿封培其遠器推此以待椒掖之同氣顧不厚歟爾謹言而敏行履和而牧謙貂蟬世家龜紫大闕有此天球琬琰之粹親賢並用列在班著既觀之以繕修之儉又觀之以欽恤之仁豈苟然哉有關睢麟趾之意而後可以行周官之法度宜識朕心可

吳昌裔除軍器監簿制

勅具官某士以登朝爲榮伯仲同朝又儒者之至榮矧同官寺乎爾學有源委氣明而材良入充坤產之賦如護瑱壁戎監務簡肩隨伯氏相與講釋

於鈎稽之餘允戈和弓森然在目杜武庫萃一門
矣其益砥礪以對寵榮可

太社令魏峻上殿特改宣教郎制

勅具官某朕待天下士靡親疎之間日博士有以
奏篇可采通金閨之籍者矣爾氣和姿整將以儒
雅便殿入對首陳天命人心堅凝之本其味悠然
而長懿戚大家好學喜文良用嘉歎升之京秩仍
司右社顯融曷奕懋稱厥家可

王極權發遣順慶府制

勅具官某果山躡於兵厥既收合餘燼還井邑之
聚渙剔蠱孽民亡止占危懷其

之爾博習修絜又學為政事吾制

謂婉畫居多舉以守果沛平詩書之澤家游泳而
人鼓舞潛藩重矣勉哉行且召可

權刑部侍郎周端朝磨勘轉中大夫制

勅一日無曠董治官之常規三年有成待法從之
令典屬嚴會課特重疏綸具官某氣莊以舒學博
而約勸露門之講發韞奧於微言紬石室之書沂
源流於絕筆越在司刑之貳久殫弼教之勤爰計
積勞肆陞華級登崇方切豈以日月而為功獻替
有加庶幾夙夜之終譽可

曾庶贈通直郎制

勅具官某猗鹿固為共蹈之謀養虎必有反噬之患山陽荼毒爾以幕僚死事闔門不免焉念之慘怛追畀陞朝之秩仍錄應門之孤魂而有知歆此殊渥可

國子監丞姚珪除祕書丞制

勅具官某自天聖至嘉祐進士上之三人多至公卿豈惟后稷之穡有相抑豐芑之仁也爾以強立之學輔致遠之器大廷射策名在龜列而安平進朕親政始徠之丞于胄監進丞于中祕盡交瀛洲之彥縱論藏室之書浩乎沛然光明秀傑之望得所封植矣可

軍器監簿吳昌裔除將作監簿制

勅具官某簿皆以糾違鈎墜而匠監視戎監為高非賢不捷進爾茂於學穎於文而縝於識蜀閬以賢聞結綬登畿諸大夫皆信其賢也擢庀除戎之屬越三日改屬于大匠雖伯氏聯治之嫌實公朝褒進之意鴻漸于干而至于磐於爾乎觀之可

著作郎兼權左司彭方除將作少監兼景獻太子府教授制

勅具官某省闥百司之綱領萬務之機衡劇矣而繕監為最簡用者以材仕者以志爾學有誠身之功心無交物之累泊乎其遇而不留也頃繇著廷

參我宰掾理明見定優於叢劇顧欲趨簡以養天
鰥何志尚之遠耶升班少匠靖共自守宗磐峙秀
往爲我淑艾之宜有餘裕可

江西安撫使陳韓除工部侍郎制

勅朕永懷 阜陵妙選法從越在內服必有獻可
替否之益越在外服必有折衝厭難之勞茲率循
於燕謀庸謹簡於英望具官某懿文而莊栗洵武
而沉雄高山深林卓爾濟時之略秋霜烈日皦乎
徇國之心自蠡動於江閩浸蔓延於嶺海民無寧
處國有隱憂屢勤繡斧之行未息耒耜之警龍遂
尉安渤海令一而而已乎景昇窮追尤來威四施
而隨定策勳獨茂締眷逾深歌出車以勞還趣韓
奕而入覲班參五正密扈豹尾屬車之塵朝進一
賢坐掃旄頭罕畢之侵究爾論思之韞副予柬注
之懷可

馮邦佐除直祕閣主管潼川路安撫司
公事知瀘州制

勅具官某瀘南控扼六詔爲重鎮頃連以法從宅
乃牧民夷按堵繼之厥選雖艱爾文有英氣政有
卓識蜀士之位表著者亟稱之擢自偏州往殿帥
闔且榮以中祕之直朕於用材可謂超越拘擥之
表矣維昔武侯將有事于中原必深入不毛七

帝之無後顧之慮也懋展夙韞稱此委可

黎伯登除直寶章閣潼川路提點刑獄

公事兼提舉制

勅具官某民無遠近悉恃部使者爲司命御史爲
朕言東蜀司臬之非材謹擇而亟易之爾靜實充
於內亮達著於外立朝未幾翩然引去累更名郡
櫛垢濯瘼聲稱藉甚出少府之節已晚故寓直寶
奎以貴之周爰咨詢則民情通不畏強禦則吏治
登惟察惟法其審克之則獄訟平蜀雖萬里夫何
遠之有可

項寅除直秘閣權成都府路轉運判

官制

勅具官某魚鳧蠶叢之國邈在參井皇華命使自
江漢差擇而上之庶忘登天之爲難爾以果達之
姿彊乂之志給餉上流旣底厥績就易飛輓之節
駕言西征其氣蓋已狎瞿唐灩澦而旁礪我雪之
表矣吏以不失平爲良民以不取贏爲富邊徼以
不求功爲安知此於將指乎何有可

童頤除直秘閣權發遣夔州兼主管本

路安撫司公事制

勅具官某夔子之國楚蜀矜吭時平急於拊綏有
虞人於空扼牧民卽衆必惟其材爾氣豈瑰偉風

采子發曩守齊安能不撓于彊衡陽又以節用愛
人著推之坐鎮三峽鞏護十連不惟刀耕火種之
民懷生而樂業平沙八陣歷歷魚復折衝應變之
略盡在目中矣往哉毋憚叱馭可

游九功除祕閣修撰知慶元府兼沿海
制置制

勅具官某四明密拱吳會遙控瀚海制閫重寄間
以法從臨之苟當其材何嫌超授爾涵負之深踐
敷之久要衝鉅鎮隨所至以最聞矧導承密旨熟
聞德意而以中祕論譔莅吾股肱郡辦治易爾雖
然維大家有禮字細民有恩龍鱗魚鹽茲究之出沒
有威靡舛厥施時乃良牧其祗若子訓可

張元簡除湖南路轉運判官兼知鄂州
制

勅具官某季子歸魯廉頗用趙民望素孚則舞轡
於熟路易爲功爾氣壯而材豐識高而論偉曩守
邊壘奮不顧身以衛其民重湖以北莫不想聞某
風采茲駕漕輶往填鄂渚號令未施列城已信其
能福我矣轉輸澄按之餘扶羸飫飢蒐惰繕圯使
隱然長城之足恃斯增重於夙望可

何元壽除太府寺丞總領湖廣軍馬錢

糧制

新其官某紹興分建四總今垂百年時有不同
其人則轉難而爲易爾蕭括而將以敏暢達而守
以靜試郡並塞不求快意之功厥慮蓋深起守武
昌以漕輓攝軍賦切切於民之瘵國之疚厥慮益
深事惟知其難則易者將至此朕所以就畀餉節
而華之丞郎也信能以仁爲本以智爲制幹盈
權取子俾挈备用裕而民不病則予以懌可

林半千除江東路提點刑獄公事制


勅具官某慶曆初謀國者欲漸易監司使澄汰所
部吏以興太平朕采是說於親政之始所易多矣
而一節以吏再節以漕三節以憲獨爾之升若梯
級然豈非進不_久矩施不失度能以儒術行耶未
聽獄之道明則不濫恕則不苛敏則不淹爾固無
俟多告察屬吏賢不肖廉濁而勸沮之使江左風
采有聞焉惟汝嘉可

丘岳除淮東路轉運判官兼知真州制

勅具官某國家有事于中原淮民征調勤止必知
其俗者順而拊之庶幾說以先民而忘勞爾淮人
也忠實而無僞精敏而有勇久宦于淮閭閻之休
戚邊瑣之利病瞭然于中朕知其非嘗試者比也
虎符龍節自西徂東科歛思所以紓之繇役思所
司之口糴之害屯田之便思所以罷行之勞蓋

鞭笞之中不失鞠人謀人保居以福一道豈特成
真之私哉可

平齋文集卷第十九



平齋文集卷第二十

外制四

貴妃賈氏贈三代



故曾祖嗣業太子少保贈太子太保制

勅朕仰觀天樞四星之象俯稽王宮六寢之儀選
名閥以建妃帥列嬪而佐后恩同宰輔秩視公台
推慶系於一門加愍章於三世具官某故曾祖具
官某忠信行乎里孝友著于家源深流長散作滂
葩之潤本固末茂敷爲沛艾之芳宜荷祉於孫曾
遂參華於宮靈肆稽故典茂發潛光升青宮三太
之榮侈黃壤百年之報歆予休渥燕爾後昆可

淺草文庫

故曾祖母於氏贈文安郡夫人制

勅古者高禰之祠帶韞而授弓宗廟之服躬桑而獻繭后必以妃參之此朕所以東求淑德陪輔陰教而成王假有家之吉也匪開其先曷昌厥後具官某故曾祖母某氏令儀中度懿行應規教子則朱轡熊軾之榮抱孫則葺蘇油幢之重慶垂三葉化應二南宜申拓於脂田用增華於翟茀予非私授爾尚祗歆可

故繼曾祖母於氏贈通義郡夫人制

勅后順承乾元朕既選之貂蟬之裔妃密贊坤德朕必選之筆橐之門顧積慶之有初宜追崇之無斁具官某故繼曾祖母某氏幽閑女則婉婉婦儀承先以千沼于汴之勤垂後以如山如河之懿是鍾邦媛實冠宮嬪沂產嘏之源流衍疏恩之命數易封名壤增賁幽局可

故祖偉太子少傅贈太子太傅制

勅赤城霞起而建標雙闕雲竦而夾路溥涵神秀發越嘉祥地靈人傑之有開德厚流光之可卜具官某故祖具官某材猷雋茂學問精深射策決科蚤登士林之望分符出守晚蹇宦路之華惟所積如江河之源故其傳全川嶽之氣子爲法從孫有賢妃子方正王化之基爾盍進儲宮之傳九京可

作百世其昌可

故祖母於氏贈蘄春郡夫人制

勅帝譽建四妃而萬化成虞舜立二妃而四海乂
蓋得正家之道廼凝治國之功茲位亞於軒龍甫
儀新於愉翟肆嘉內德爰獎先徽具官某故祖母
具某氏秉柔嫺之姿履惠和之行閨門視則嫺黨
推尊生也有涯蚤棄采蘋之絮死焉不朽終流芳
荇之芳號既正於小君封更加於大郡優乎如在
其克祗承可

故繼祖母陸氏贈和政郡夫人制

勅唐之昭妃有以恭順稱者有以敏淑稱者雖享
天姿之懿實原世範之嚴具官某故繼祖母具某
氏步節佩環聲諧琴瑟言言乎勉君子之正翼翼
乎承先祖之恭身無愧於女箴家克貽於嬪則膺
子光寵具乃肅雍紫綬金章既視儀於一品文軒
象服宜追命於重闈益開湯沐之封永燕君蒿之
祀可

故父涉太子少師贈太子太師制

勅梁傳有孫首被世宗之選膠東生女亦形光武
之思推百世之發祥驗一門之流慶肇新妃掖追
貴親闡具官某故父具官某敵愾精忠折衝遠略
披攘妖祲功成淮泗之郊撫納遺黎恩被淄青之

境施隆而報必腆積厚而發亦閎象開次北之星
光映遡明之月關睢寤寐思服克參窈窕之求雞
鳴警戒相成更致盈昌之助望孚禁壺澤被私庭
進東宮師範之尊修北岳神休之應繩繩螫螫尚
克相之可

故母史氏贈太寧郡夫人制

勅葛覃后妃之本必以在父母家志女功之事言
之子得賢妃言動中繩矩母訓豈無自來哉具官
某故母具某氏出韋平之裔歸嚴徐之門熟薰染
於詩書恪步趨於禮法維蛇協夢篤生淑嫕之姿
陳燕占祥為近衆多之杜睠起家之垂慶宜告第
之䟽榮由錫郡封永綏廟食可

桂如琬除川秦都大茶馬制

勅具官某若出於蜀駟駿來於秦熙寧分職元豐
合之故邇者權牧分而復合爾氣稟溫良治理平
易夔巫之民安其政進嫺閣之直總秦蜀之務興
利除害必有得於熟聞素講者詩曰秉心塞淵騶
牝三千又曰思無疆思馬斯臧精爾心思之運蕃
吾克廐之良魯衛之政且將改聽易視矣往哉母
忽可

高稼知沔州兼利州路提點刑獄公事

制

勅具官某汚屏翰梁益而扼秦隴自關堡險阻蕩
析於兵燼連年繕治舊觀猶未還故擇牧尤遴爾
氣度軒豁議論精到周旋閫幙秦蜀如指諸掌朕
方趣之來將有訪也而汚非爾莫固吾圉榮以木
天之直一道臬事併屬之拊循必厚經理必密東
西應援同獎王室必睦小大之獄必以情奉計入
奏有日矣可

陳隆之除直華文閣知興元府兼安撫
制

勅具官某西顧之憂朕未嘗一日忘也制蜀旣分
置使劉梁以謀帥請得非原堡失其險難於方
面之勲並爾出入兵間而膽略雄往來塞下而幾
籌熟汚雖重孰與梁重進直文奎建屏作牧民生
之未殖者爾集之軍政之未覈者爾飭之邊防之
未密者爾緝之聲援合而彼已無異情志慮公而
内外有實政守固而戰克矣往勿替朕命可

權兵部侍郎陳公益除集英殿修撰知
漳州制

勅荷紫橐而事主儒生之榮擁朱轡以奉親人子
之樂肆升華於論譔庸增重於蕃宣具官某韞篤
實之姿迪中和之度通今博古曾靡事於空言明
善誠身常自安於平進翼翼從塗之列閭閻經幄

之游如慶雲莫能名其祥如時雨不自知其潤屢
抗分符之請勉為紬史之留既上送官爰畀便郡
睠言漳浦近接海雖綠林妖侵之已空而篁竹
驚魂之靡定亟圖綏輯盡息歎愁雅在本朝豈不
念蕭生之志咸知上意正欲觀黃霸之功可

吏部郎中權國子司業王與權除國子
司業制

勅具官某大少司成並置定於隆興朕既得老成
之望為大司成以範多士少司成亦必於士望乎
取之爾經明而行修本固而末茂宜為人師白首
郎潛攝貳成均士翕然胥嚮三學之教法政令非
爾其誰導夫學校長育人材之地寬以來之必嚴
以導之生徒斤斤皆有法度陽城所以陶冶人心
必有在於記事纂言之外者知此則知樂正后夔
教胄子之意可

樞密院編修官兼右司尤煇除樞密院
檢詳兼右司制

勅具官某宰樞掾軍國之筦彊弱安危出焉淳熙
甲辰乙巳間三邊無塵九扈樂業時則有文儒以
檢詳為右司行其所無事而天下安強蓋爾祖也
去之五十年爾以奇材壯志踐厥官故事便宜家
有遺墨自公退食盡取而閱之以尚論其世豈特

寶魏證之笏哉朕方懼祖武之不克繩故申告可

太府寺簿趙汝遂除樞密院編修官兼

權兵部郎官制

勅具官某刪潤置官隸樞屬爲卑在紹興有若直臣銓在乾道有若名儒熹能大其官爾拔于公族名在甲科鞅掌州縣坐閱群飛之刺天而無競心不旣賢乎朕蒐英獵雋首在選中擢掾宥廷攝郎武部以貫穿馳騁之材與聞廟畫從容援古誼以訂邦國之若否所居官大矣毋安於卑而不之勉可

太常寺簿朱揚祖除樞密院編修官兼

權刑部郎官制

勅具官某八陵隔於腥膻踰百年讎虜燼滅俘來以圖朕灑涕恭覽慨懷朝謁謀及卿士爾銳於行犯暑披榛祗欵陵下橋山弓劒儼乎猶昔而嵩洛之王氣可挹也星言歸奏良尉朕心進編摩於宥府仍攝事於郎曹姑獎忠勤實階選拔可

羅愚除淮西提舉兼知無爲軍制

勅具官某王師順動科調繁興朕懼淮民之告瘡亟下詔蠲逋已責毋收今年租非部使者之賢殆壅吾澤爾名家之雋論事剴切處事精練出守江城不求有餘於官而慮民之不足田里用乂其以

一節觀風于淮右平爾糴公爾權察州縣吏奉吾
詔不勤而厲民者糾逃之人心固則國勢強矣濡
湏斗壘特游刃之餘可

黃朴除著作郎兼權考功郎官徐清叟
著作佐郎兼權司封郎官葉味道著作
佐郎兼權屯田郎官並仍兼崇政殿說
書制

勅具官某元祐初程頤說書崇政范祖禹在著廷
朕登崇峻良思得若人發六經三史之韞爾以魁
壘之彥立于朝如玉在山輝潤虹貫經帷論說屢
為席前承明金馬之遽網羅舊聞採摭前記以

二代之史茲舉以屬爾涵養君德鋪張帝典求
媿於昔賢可也青綾入直又以觀爾之吏能可

校書郎杜幼節除祕書郎兼莊文府教
授制

勅具官某漢藏書麒麟天祿命劉向楊雄與校謂
之中祕書後漢藏之東觀以馬融為郎惟其稱也
爾深於龍韜豹略之學而進於經尉為兩科之雋
翺翔冊府摩光奎壁序升以司四部之圖籍且為
宗藩師疇不謂稱乃若萬里之情三邊之勢討論
餘隙試為朕孰計之可

趙與懃除太府寺丞余元虞國子監丞

章勸太府寺簿高奎國子監簿制

勅具官某君人在於阜財明道大府掌貢賦之貳師氏掌教國子不容偏廢也與勲擢秀宗盟首騰關決之最其爲我丞外府而以吏事通敏能稱其家之勲爲之簿元虞蜚英膠庠久著敷歷之譽其爲我丞冑監而以邊畫精練克踐所學之奎爲之簿夫善政得民財善教得民心其得民雖不同而同於盡君師之責爾等其各效厥長以助予治可

資政殿學士提舉萬壽觀兼侍讀宣繒
除資政殿大學士光祿大夫提舉洞霄

台制

勅朕瞻懷元祐登用群賢范鎮以內祠召而辭不
馮京以勸讀除而請老維予宿德有昔遺風肆加
進律之恩庸渙告廷之綍具官某體全碩大性韞
端良蚤擅文場盡奪諸儒之氣晚躋政路首參元
化之機國論之可否未明人材之進退未決深沉
籌畫密勿敷陳已究同寅協恭之謀迺抗陳力就
列之誼功成名遂而身退固適雅懷齒宿才壯而
意新每形渴想屬親政柄趣侍經筵遠稽真廟
之命耆儒近法阜陵之尊舊學亟宜強起胡不
果來進祕殿之大名升爭臣之穹秩夷猶故里
薄殊庭式昭體貌之隆增重儀刑之舊且酒醴維

醺以祈黃耆豈忘壽俊之思母金玉爾音而有遐心尚賴遠猶之告可

劉用行除太常寺簿制

勅具官某孔子先簿正祭器寅清禮樂之府簿非冗曹比也爾以凝重之器和平之政久著聲於湖表擢實容臺禮制樂作皆參聽之漢儀雜秦唐舞曰隋情文本未必稽其失而糾其違毋徒諉之簿書之末可

宗正寺簿林申差權發遣安吉州制

勅具官某衆賢聚於朝而郡國吏不能皆賢元氣猶未貫也故間擇周行之彥以出守爾博習明經蚤藹時譽翔而後集甫簿正于麟宗吳興闕守輟一賢以惠之漢選博士諫大夫爲守相之意也脩門咫尺轉聞良易勿棘勿弛圖惟厥中可

大理少卿謝奕禮除右文殿修撰主管佑神觀仍奉朝請制

勅具官某本朝家法上軋三代威畹富而貴之不及以政豈特防微杜漸之意示優異也爾晉太傅之懿傳漢長秋之篤友丰神氣度灑然塵表詎容久煩奏讞之冗升班論譔賦廩內祠日奉便朝玉色而山立優且榮矣益厲謙恭之美對敷光大之休可

林應龍轉承直郎制

勅具官某飛錢造幣蜀材孔良灌輸外帑歲有常額爾董裝發應我賞科其進一階益勤勿懈可

戶部侍郎准東總領岳珂磨勘轉中大
夫制

勅虞廷考百工之績而黜陟行周官計群吏之治而誅賞定茲疇勞於法從宜疏渥於綸言具官某蚤擅長材屢膺煩使控天塹之勢望久著於筭鞭參地官之權班寢高於禁橐闕匪一朝之積課當三歲之遷爰舉彛章式增文秩元豐近臣之品特示寵榮紹興名將之家益殫忠藎可

慈聖太后山陵復土提舉官吳惟德轉
翊衛大夫制

勅慈殿升真渺僊游於少廣茂陵卜祔蠡王氣於橋山廼睠按行之勞特循褒進之典具官某稟姿溫恪莅事精勤北省承休特重遭逢之慶東朝罹變可勝攀慕之悲沂沙麓之慶源相稽山之吉壤龍盤輦勢駟馭妥靈宜陟序於橫階用增華於留務益思謙益祗對恩榮可

叅知政事曾從龍贈三代

故曾祖詳太傅贈太師制

勅朕進

寧考之舊臣懷

昭陵之碩輔修紀綱

於基命宥密之日問政令於同寅協恭之時終定
策于兩朝用垂休乎億世去之幾葉有爾曾孫具
官某故曾祖具官某靈臺湛凝泰宇昭晰忠和孝
友之行悉本諸身詩書禮樂之風遂昌厥後卓犖
倫魁之彥雍容近弼之聯遠泝慶源丕敷愍冊巖
石之瞻師尹蔚爲寵安之光故國之有世臣益介
雲仍之祉可

故祖澄太師衛國公贈魏國公制

勅元受之參則一貫忠恕之學參得之點則浴沂
舞雩之風出雲必自於太山導漾實由於嶠冢不
遡所積曷觀厥成具官某故祖具官某性抱冲和
氣涵磅礴款段下澤風優鄉里之評駟馬高車終
遂門閭之志鍾聞孫而間出參大政以更張爰敷
告第之恩庸侈傳家之慶自天錫羨文公之衛允
臧易地進封畢萬之魏必大營魂儼在寵渥祗歆
可

才人賈氏故伯冲贈迪功郎制

勅具官某氏故伯具某人維邦之媛建閭後庭澤
暨一門厥有令典爾其伯父拱木已陰初品追榮
尚歆殊渥可

才人賈氏故兄承奉郎貫道贈承事郎

制

勅具官某氏故兄具官某維邦之媛建閣後庭澤
暨一門厥有令典爾其同氣拱木已陰進秩追榮
尚歆殊渥可

故母弟迪功郎史商卿贈修職郎制

勅具官某氏故母弟具官某維邦之媛建閣後廷
澤暨母黨厥有令典爾其季舅拱木已陰進秩追
榮尚歆殊渥可

趙以夫除江西路提舉常平茶鹽公事

制

勅具官某江右壤接閩粵創殘未補思得賢使者
藥石而梁肉之亟還元氣之舊爾以公族儀儀之
麟周旋外服藉甚有聞輟臨漳之符以便節幸一
道部邑南豐緊乃故治民之情僞俗之良窳皦如
示諸掌咨諏所及精采一變積愆甦醒矣亦惟深
求大學以義爲利之意則獲我心可

秘書少監趙汝談除宗正少卿依舊兼

權直學士院制

勅具官某宗正四星在帝座東南漢取象置官以
序九族辟彊德更生遞爲之爾學如辟彊行如德
文采議論有更生之風羽儀道山脩然澤耀輝浸
群玉不可得而親踈也維今屬籍蕃衍盛大過劉
氏其爲朕莫世繫辨昭穆而陶之信厚以重盤石

之宗視草鑿坡則已試可笑可

袁甫除祕書少監制

勅具官某朕惟五緯聚奎天開離明之運科目取士而異人出焉故親政以來招選魁躔之雋登之政途列之經幄且進之策府爾學傳于家磨礪于師友所造蓋深麾節收屆既推詩書之澤浸其民又合秀民佳子弟以義理性命之學啓迪而薰陶之自任以斯道若此參領登瀛宜矣詩曰樂只君子邦家之光其疾驅以副虛佇可

張嗣占右文殿修撰知平江府制

勅具官某漢重三輔唐重四輔闔閭故國吾股肱郡也選任維艱蚤聞前輩之論議孰識昭代之典章而才諒足以濟之龍泉干將鳴匣蓋久用之惟恐不亟北門留鑰雖輟于行屏翰近畿徒得君重其通班于祕殿往宣朕意時和歲豐坻京相望民有漁陽不可支之樂而無新店實強取之苦斯稱厥職可

趙立夫除祕閣修撰樞密副都承旨制

勅具官某天下之勢猶衡朕既遴東廷彥出長外服必博選民庸入治內服然後無輕重之偏爾頃繇九列觀風近甸聲氣不搖而百蠹戢蓋吏師也孝宣厲精政事樞機周密周貴加詳密貴加謹維

爾老於識而精於慮式遄其歸以譔著中祕參看
廷之導首周密以濟中與其庶矣乎可

朱鑑除大理寺簿林環軍器監簿制

勅具官某等作士而致猾夏之誅獻囚而參獻馘
之禮此致刑諸戎所以分職並命也爾鑑所傳者
正濟以疏通爾環所養者厚守以靜退朕惟兵刑
非二事既命鑑以鈎棘寺之違又命環以稽戎監
之闕能使析楊卧於園扉戈鋌森於武庫厥職無
不舉矣可不舉矣可不

張元簡除直寶文閣知鄂州兼沿江制
置副使制

勅具官某江漢上流而下三制閫相望裹拓表
之勢也鄂渚參襄陽金陵之間事權既還責任與
等爾氣盛於折衝謀深於應變而崇論足以發之
廷臣謹謂可當一面寶奎寓直龍節虎符往爲朕
控長江而制勝遠觀三國必爭之形近考中興布
置之略民力汝裕軍實汝充千艘萬弩汝肄墜者
舉惰者奮而隱然老羅當道之足恃乃言底績矣
可

權戶部尚書真德秀除翰林學士知制
誥兼侍讀制

勅天下之動正夫一務興起於群心聖人之情見

乎辭在宣昭於大訓迪惟仁祖有若臣脩朝京
師於甲午之元拜內相於季秋之月其深厚則兩
都之正氣其坦明則三代之遺風登崇若人鼓舞
斯世具官某剛而濟以大和而約之中殫見洽聞
學貫乎百世之上崇論閎議名塞乎兩儀之間
先帝封植以詒謀冲人招徠而訪落甫辭徂直遽
厭論思羔羊素絲五紵每慨懷於正直白駒生芻
一束徒嘉歎於逍遙惟碩果之剥不窮故拔茅之
泰有待少重十連之寄遽歸八座之班屬親攬於
皇綱志中興於帝業予欲山東之聽詔令觀化成
於須臾予欲河西之被璽書驚明見於萬里疇咨
大筆樂得英髦趣躋鼇禁之崇仍侍虎門之邃虞
夏之書渾爾遠追雅奧之風堯舜之道皇方備究
緝熙之益尚圖大任用穆群瞻可

曾穎秀除浙西路提點刑獄公事制

勅具官某畿內部使者諸道取則非識召南甘棠
行露之意不在繡斧之選爾篤學喜脩風裁簡遠
抱夜光而不輕售起之浙右之節行以絜矩之道
貪殘退聽善良吐氣四方將於是乎觀不特徃行
之無冤也矧伯氏陳時臬事于閩其思光華所被
無遠邇之間可

都官郎中傅雍差知嚴州制

勅具官某諫大夫有以直聲著於嘉定初者吾不得而見之思用其子爾謹守家學而有父風不阿不詭安於平進朕始親政事既起之丞又進之郎顧猶退然以疾辭維爾郡縣最著於江閩久矣嚴陵輔邦姑分符竹少需葵丘之戍以俟疾平朕不汝忘也可

鄒應龍父微贈宣奉大夫制

勅歲儀世室備殫饗帝之誠肆眚端闡誕布漏泉之澤矧義方之垂慶宜愍典之追榮具官某侃侃德人怡怡善士一真不鑿但知積玉之藏萬卷有傳何愛簞金之滿鍾倫魁之雅望通法從之宵旰嚴父之禮既成顯親之恩可後蕭零湛露特升一列之華木撼悲風尚吐九原之氣可

葉宰直華文閣知泉州制

勅具官某朕嘉與海內更始疇昔庶士御事淫朋比德者退之有爲有猷有守者進之而內外肅爾以直簡之器明通之識列在烏府幹棄周鼎而寶康瓠時論日陂乃能不爲成股之隨有識韙之泉七閩望郡且筦琛航凋憊久而未甦爾其以奎直起家熟思振刷之方挽回富庶之舊用稱簡拔可

陳舜臣湖北提點刑獄公事林演提舉

湖北路常平茶鹽公事制

勅具官某等禹貢田賦定於雲土夢作乂之後召南獄訟息於美化行乎江漢之餘今荆楚境也故出節而分遣爾舜臣以詳練之材治邕管遠民安之司庾湖右就進憲節明刑弼教必能使江漢皆善俗爾演以平易之政治景陵人有去思易麾安陸亟進庾節推利予民必能使雲夢無橫歛夫監司賢則郡守賢郡守賢則縣令賢轉移習俗當自身始保護風寒亦惟本固往懋哉可

桂萬榮直寶章閣知常德府彭方直祕閣知袁州制

勅具官某等汲黯願出入禁闥蕭望之雅意本朝士以華近爲榮自昔然也而吾望郎如萬榮名監少如方顧牽聯以外庸請豈朕待賢之道有未至耶抑賢者體國無內外之間也武陵統乎澧辰沅靖宜春介乎潭洪贛吉其俗皆易治而難服爾萬榮予職往守武陵爾方予職往守宜春寬以字之靜以鎮之異壤而同治矣朕將於此乎選表可

留元剛轉中大夫直寶文閣致仕制

勅具官某唐以博學宏詞設科裴度陸贄李絳杜黃裳繇此途選今其蜚聲是科者皆列在禁近惜一賢之不及見也爾學該七略文成一家先朝以殊科擢真柱下史未爲不遇而留滯周南抑何久

耶未衰告老宜實僅秀進之華秩仍直寶奎以寄
賢雋之思尚祗休渥可

權刑部尚書李臺除權禮部尚書兼侍
讀制

勅義易之定民志莫先乎乾坤衣裳禹範之叙彝
倫莫大乎威福王食朕收還八柄扶立三綱堂陛
之分既嚴鼎呂之勢斯重爲國以禮待人而行具
官某氣清而神腴齒宿而意壯齋淪其學瞿唐三
峽之深紆餘其文邛郲九折之峻自夾螭而振武
屢鳴鳳以蜚聲去不可留用然後見油幢中立坐
息江湖之波茸蘼外馳盡收我雪之侵茂賢勞而
不伐堅初志以善藏玩世何求際時乃出渴大老
之入見促便朝之給扶中庸九經所陳者天下國
家之道丘索五典所讀者上世帝王之書嘉德義
之可尊知文獻之足證擢繇司寇進攝春官以正
名爲衛之先以秉禮爲魯之本豈止九賓之臚句
群臣無敢誼譁抑令三輔之威儀老吏或至垂泣
乃若石室太史之業金華師氏之功具罄英猷奚
煩多訓可

禮部尚書陳卓除吏部尚書兼給事中
兼侍讀制

勅朕仰惟

孝廟夙重天官妙選於乾道淳熙之

間豈一二士真除於俊卿必大之後纔三數人矧
趨瑣闥之嚴仍侍露門之邃輯茲茂渥屬我耆儒
具官某玉粹而春和霜明而秋潔代言爾雅蔚乎
廊廟之文批勅森嚴屹然社稷之器久周旋於禁
橐日密勿於宸旒望之則祥麟威鳳之在廷親之
則天球洪璧之照几簡知惟舊鄉用采深瞻遵晦
於十年甫厲精於期月內閑請謁既絕側門敕授
之風外杜營求盡革都堂唱注之弊猶慮三銓之
法未精九等之材疇庸儀曹冠序選部以水鏡之
清而洗世道之濁以衡石之公而遏物情之私品
藻之鑒既高論思之望逾重帥屬掌治朕方思周
公六典之規知人安民爾盍究臯陶九德之訓祇
承眷倚懋對儀圖可

崔福轉兩官制

勅具官某邊城讎保虜將火攻烈焰駕風危檣飛
燼受降旣久論賞可稽峻陟武階力圖忠報可

故通直郎游九言特贈直龍圖閣制

勅具官某洙泗之傳爲伊洛伊洛之傳爲建之熹
潭之拭得其學者皆能著見於世爾天姿敏強博
極群書而質疑就正於二子體之心驗之身且推
之民其學進乎成矣習僞有禁秉德不回棄通籍
而抱遺經賁志黃壤朕聞而嘉之義圖寓直表厲

節介光明芬郁於百世者未嘗沒也可

葉奭除宗學博士金淵國子博士戚士
遜太學博士袁商武學博士兼魏惠獻
王府教授制

勅具官某等漢重師法淄川濟南齊魯燕趙之學
皆以專門名家爲博士或變其師說雖衆薦不得
與厥選蓋精爾奭直而方有折角之風爾淵莊而
靜有下帷之志爾士遜明而整五業並授爾商端
淵士遜于上庠進商于右庠仍範我麟定各推所
蘊招諸生立堂下誨以仁義道德性命之歸正學
有傳矣可

將作監簿劉克莊除宗正寺簿制

勅具官某鶴鳴于九臯聲聞于天士抱負足以鳴
於世雖渺隱未有不達於朕聽者爾學有源文有
度歛芒鏗采不與韋布角進而英聲發越不容揜
朕夙有聞焉瑤牒屬籍與慶系僊源圖譜纂輯于
司宗天近地嚴有列其中者皆名儒咨爾往簿正
之途轍清矣益養其聲之所自出以鳴國家之盛
可

戴朮宗學諭何處恬太學正馮去疾太
學錄王萬國子錄制

勅具官某等士始進于朝而優游詩書之林饜飫
道德之海不其榮乎爾杰之溫明雅有風致爾處
恬之沉厚蔚有典刑爾去疾之雋邁遠有志槩爾
萬之純茂深有韞藉其學皆可爲人師杰往諭宗
庠處恬去疾萬往正錄成均進之始也大學始教
皮弁祭菜宵雅肄三知此則知立教之本可

顏頤仲司農寺丞魏峻軍器監簿制

勅具官某三代盛時因井田以制軍賦廼積廼倉
與干戈戚揚非二事也農寺戎監故並建屬爾頤
仲抱材通敏治郡可紀其歸以丞治粟之司爾峻
賦安爽亮立朝可觀其進以簿儲戎之府太倉武
庫雖異厥職農以養兵兵以衛農尚於斯有考可

韓濤除太社令制

勅具官某司社置官紹興中首命臣彥直爲之蓋
以光寵勲將之家爾同出一門克紹弓冶庀職漕
幕能寡悔尤茲故命之世厥官知寅直之難秉而
輕肥之易縱則亢厥官矣可

史宜之直龍圖閣致仕制

勅具官某維昔 兩朝元輔之猶子宜之均佚釐
館以謝事告亡幾何台星亦圻朕念之怛然爾敷
歷四十餘年業行在州里政理在郡國人能誦之
胡遽止於斯也華屋山丘恍其昨夢淵圖進直尚

服恩榮可

王陞轉承節郎制

勅具官某造幣之楮來自蜀道爾督綱程靡有稽失進秩一等用酬勞瘁可

同鼎武節郎來伯友武翼郎王聞顯武節大夫呼延賞武翼郎制

勅具官某等漢開降者封賞之科唐著異域歸忠之傳爾委身主國效力邊城疊二秩以升華肩一心而圖報可

張震雷張萬取並補承信郎制

勅具其人等武舉以郭子儀重爾兄弟講磨兵略外省聯登屬邊關之贊籌阻萬里之入對悉授初品開之榮途其相勉以功名見可

史彌鞏轉朝散郎高不儔轉奉議郎制

勅具官某筦樞國計所關羨利必賞爾庀職京口克懋厥官歲入有常能溢其額俾進升於一列庸獎厲於勞能可

不儔政京口爲畿內

高平郡夫人毛氏進封和國夫人制

勅明德伏波之女自蘭發祥和熹太傅之孫由陰毓瑞睠慶源之特異宜寵數之增隆具官某氏性行金相容儀玉度河山稟粹嬪于相國之門江漢流徽鍾我倪天之妹篤禕衣之致養侈象服之䟽

榮號既正於小君秩更加於大國祗膺休渥茂介耆齡可

楊恢除直徽猷閣權知襄陽府京西安撫副使制

勅具官某西清邃閣列聖圖訓在焉寓直其間非積望之舊效績之新不輕畀躡級而升尤爲異數爾擢岷峩之秀吞雲夢之雄進牧京襄坐控許洛文奎峻直越三等而上之蓋以方面之勲望爾非徒以華爾也矧徽猷實維哲廟寶儲遐想俘獲鬼章青宜結之盛尚起壯志可

彭鉉廣東路提點刑獄公事石孝博廣

東路轉運判官制

勅具官某等五嶺之東官以征粟鬻醪牟利民一疏食不獲安或怵於無聊而動朕甚憫焉爾孝淳守曲江無苛政既出節以推平反之惠就畀外計坐輪賦輿爾鉉守南安有善譽甫增秩以獎中和之最趣攬儒轡往司祥刑其踐實同好整同熟於治理又同觀省民瘼廉訪吏茲相與布宣詔條如朕臨遣毋使遠方重蘇洵刺史又抑之歎也可

陳畏浙東路提點刑獄公事制

勅具官某泰與否相爲消長疇昔人材排根於檢人耳目之官者朕悉起諸家食用之不遐遺爾豈

身而廉端方而靜中外之譽俱高資稟施以盈室
判獨離而不服宜險德之莫容也錯枉舉直公道
是張左制鄉部亟爲朕起衣繡而畫行獄讞之亭
吏治之澄惟爾風力之凝可

平齋文集卷第二十

平齋文集卷第二十一

外制五

司農寺丞陶木除太宗正丞制

勅具官某宗正以卿少丞簿聯事合治太宗正獨
置丞簡且嚴乎爾融明而凝重有韞而不褻論奏
亹亹切於爲民旣俾丞大農矣重惟明德睦族之
意非賢莫宣故亟進之以丞大宗尚書郎之選於
此乎儲勉佐乃長母以再轉爲淹也可

權兵部尚書史嵩之除寶章閣直學士
宮觀制

封萬里之侯不足以敵過庭之榮佩六國之印

不足以易戲綵之樂方杖杜之還役乃式微之賦
歸具官某蚤奮儒科寢躋朝列牧民御衆擁漢水
之駢旌舍爵策勲佩甘泉之紫橐雖向日之云切
顧望雲之抑深願爲返哺之鳥退奉閑居之燕重
違雅志俾領真游以西清嚴邃之聯致南陔怡愉
之養石舊之教素謹諒亟下於里門子牟之心常
存尚毋忘於魏闕可

林楷特轉朝議大夫直敷文閣致仕制
勅具官某情莫切於閔勞恩莫厚於崇卒廼者赤
子嘯兵三衢朕爲之丙夜不安枕爾以公平廉靜
選拔出守雍鉏稂莠不遺餘力廩廩向還定矣而
病以革告天胡奪之亟耶進官一列升職四等用
書爾樞尚克知歆可

趙范除龍圖閣學士京湖制置大使兼
知襄陽府制

勅仲淹守慶州而純粹踵其成規世衡築青澗而
种諤保其遺績繫戟纛交輝之盛實衣冠奕葉之
榮具官某望壓江淮志吞河洛前茅後勁不虞街
亭節度之違左橐右鞬益慕金城圖略之上獨差
彊於人意常簡在於朕心睠上流形勢之雄有乃
考威名之著闕如虢虎賢於長城爾嘗從士燮之
心廉頗之用趙士冠西清之邃職護

上
元農扶杖以歡迎喜談舊事宿將帕
紅而上謹誓立新功惟寡欲可以全剛惟集思可
以廣益惟多筭可以制敵惟不殺可以結人守果
見於有餘攻奚憂於不足功名未艾何止復鴈門
之踦機會無窮正可奮澠池之翼勉揚先烈用荅
殊知可

史洽轉奉直大夫制

勅具官某間者韃犯信陽略雲夢轉黃陂而薄浮
光虐燄蓋烈烈也爾爲守將能識事機亟調貔貅
奮前迎擊賊虓氣而宵遁可謂敏則有功矣一歲
三階實爲異數賞無倖得其懋承之可

孟點鄧泳各轉一官制

勅具官某等唐鄧息蔡復歸版圖雖發縱之有人
亦莫府之交助爾能知體國不憚從戎効婉畫於
郾城贊成功於峴首特升一級用獎賢勞可

樓昉贈直龍圖閣制

勅具官某士君子存心養性以事夫天壽不貳以
立命豈計一時之屈伸哉爾淹貫而有歸正固而
不撓蓋深於道者立朝莅郡聲稱甚茂井雖滌而
可汲需見險而竟止此心不失其本然之天則命
自我立宜區區者之不能縻也王通氏抱太平之
策以歿房杜諸賢卒用之以昌正觀之治道安有

終屈而不伸耶義圖遂直仍錄遺孤拱木九京尚
其可作可

李道傳贈直龍圖閣制

勅具官某學以見道爲難苟有見乎道則形而爲
實踐發而爲正論推而爲美政無異源也爾以蜀
莊之珍薦清廟之璧踐履也方議論也剛政事也
昌非漸乎師友之澤洞乎聖賢之奧殆將委厥美
以從俗蘭芷變而不芳矣西風寥碧駟虬獨遠跂
予望之惜不我遇奎躔峻直且表其孤以一時之
屈易百世之伸爾尚奚憾可

胡夢昱贈朝奉郎制

勅具官某朕訪洛伊始首下詔來譴直蓋與諫鼓
謗木同意以直言求人而以直言罪之豈朕心哉
爾風裁峭絜志槩激壯繇廷尉平上書公車言人
之所難言方嘉貫日之忠已墮偃月之計問途胥
口訪事瀧頭曾無幾微見於面何氣節之烈也
仁祖能全介於遠謫之餘孝祖能拔銓於投荒
之後撫今懷往魂不可招潦霧墮鳶悲悔何反陟
階貞外仍官厥子用旌折檻之直且識投杼之過
爾雖死可不朽矣可

徐瑄贈集英殿修撰制

具官某舍生而取義殺身以成仁惟剛者能之

爾燭理明植志果屢躋而氣愈勁晚治廷尉獄休
之風旨不移壓之禍福不折据經訂律反覆開陳
寧以一身試不測之淵而不忍以根連株送之命
資其身委蛻炎瘴其甘如飴非所謂剛者乎唐司
刑有功守死明道不阿言詭辭以求苟免吾於爾
見之追榮論譔仍錄遺孤英魂如在尚知未有久
而不定之天也可

陳宓贈直龍圖閣制

勅具官某 列聖以隆寬大公涵養天下敢言之
氣故雖世道波靡必有巍然自見折茲萌而扶正
論者爾風猷名相之裔學問諸老之傳刷行出政
具有源委嘉定一疏朝陽獨鳴於萬喙皆瘖之頃
儉壬褫魄而不敢肆頑鄙洒心而思自立何其偉
也分符畀節挽之莫回樂道著書死而後已砥柱
斯世之功甚大進直淵圖仍獎厥子泉扃有知其
識予恨不同時之意可

張栻中奉大夫致仕制

勅具官某岷峨多奇士朕弓旌下招絃網略盡其
不克忍死以湏更化則囿於命爾抱材翹雋蘊識
超邁分教眉山適遭蜀變慷慨灑涕不草賀偽之
表志節立矣入儀班著出最麾節方將滂洋厥施
以盈科之後何返壑之速耶萬里蒐賢于嗟靡及

一階告第冥漠知榮可

楊必復贈朝請大夫制

勅具官某聖人有金城以守圉扞敵之臣能死城郭封疆也爾乘障文南不虞潰卒之涉境挺身諭告期革鷄音雖披赤心竟蹈白刃望風棄郡紱而逃者宜知媿矣優加愍典超進華階仍俾世延用旌死節可

尤元龍贈通直郎制

勅具官某尉以警捕為職盜發三衢爾能躬帥弓刀嬰其鋒而之死之職不曠矣官之升朝仍錄厥孤尚紓九泉之悲可

趙與貌贈奉議郎制

勅具官某韎韜頃為不道犯我應山爾以戶曹攝邑寄勇於徇國率厲戍卒輿臺迎擊之雖死於寡不勝衆而氣吞此虜矣旌之華秩用尉忠魄可

宋昭遠贈通直郎制

勅具官某鹽城之役飛芻走粟以餉師亦既勞止又轉致于山陽宜爾馬瘡僕痡而卒於行也官以升朝知予閔恤可

吳淵轉朝奉大夫制

勅具官某漢堯鹽鐵有官唐權茶有使利源出於東南為多均通得宜經費用裕爾以儒術飾吏事

以宰士贊邦計提綱莞樞有條不紊一歲之入沛
乎其贏既應懋賞之科宜進正郎之秩毋忘體國
用對恩華可

趙必瀾轉承議郎制

勅具官某虜保陡山王師進討調度旁午陸運尤
艱爾贊畫於計臺備宣勞於供億進升一列益礪
廉勤可

王子申落致仕除刑部郎中制

勅具官某韓厥既老而稟政留侯道引不食穀而
強起材足以爲斯世用誰容得謝爾操尚渾厚風
致簡遠郡國選表再召再辭遂以垂車請幅巾林
壑獨立氛塏之表固泊乎世味矣朕訪西南人物
於朝謂爾年耆德明精神猶未衰懷香憲部勉爲
一來霜峽放舟使觀者知朕能致華髮於萬里顧
不肆歟可

趙希昔除工部郎官制

勅具官某朕日御便朝與二三大臣妙柬四方之
雋又登崇之廼睠西顧有公姓之老在爾秉心靜
夷制行縝栗聲問蚤穎擢于政事之科晚守東川
材益練政益美捐有餘以紓征調之迫家誦而人
德之卷懷滋久宿望猶鬱握蘭起部宜不俟駕蜀
之邊防軍實民賦吏治爾平日講之蓋熟朕將修

輦過郎舍故事而問焉可

辛稹潼川府路提點刑獄趙希濬夔州
路提點刑獄張起艮成都府路提點刑
獄公事制

勅具官某等東井法令所取平參下三星曰罰主
斬艾分節司憲於參旗井絡之分加遴惟均爾稹
世傳威望身佩材名直指夔巫姦宄屏息其進以
典東川之獄爾希濬氣稟篤厚政術寬平共理眉
山田里熙豫其升以司巴峽之臬爾起艮吏事詳
敏邊籌精練出入制模多所毗益其擢以亭西州
之讞在易責無敢折獄豐折獄致刑噬嗑明罰勅
法皆有離象取其外剛而內明也然無慾者必剛
無私者必明爾等果能以明用剛則數道之間吏
之不良民之無告悉瞭乎目擊矣欽哉毋謂君門
萬里之遠可

汪之強歿於王事特贈朝奉郎與一子
恩澤制

勅具官某魯誅責父漢錄孤兒閔死事也爾庀職
淮模密參機籌變起倉卒父子併命聞者悲傷之
進官一等澤及遺孤營魂有知可無銜憾可

楊伯雨除夔州路轉運判官制

勅具官某四蜀財計莫豐於大寧鹽筴之入數十

年來漕臣以羨餘濟苞苴囊橐無遺利矣朕欲變而通之故謹擇所使爾材甚穎政甚練可使治其職也一節起家六轡督餉擁牢盆之富運筭鞭之長輕車峻阪夫誰能禦然民力竭矣盍思所以裕之軍餉棘矣盍思所以濟之利源無壅上下阜通朕蓋於此乎課爾之廉能可

王翔除直祕閣利州路轉運判官兼知利州制

勅具官某寧武控梁蔽益夙號重鎮故必以漕兼守而制閩亦於此立莫府今閩外之制移梁閩內之制還益漕守滋重爾材茂而識遠志堅而慮密隴蜀山川之形勢兵民之便宜歷歷在目中玉節銅符采衆譽而併屬且木天寓直以華之委寄隆矣夫邊儲軍實以厚民爲本農桑勸則食貨通田里安則保障固祁山斜谷之運與中和樂職之詠實相表裏爾其懋圖之可

黎伯登除直華文閣知潼川府制

勅具官某實材用則天下治堯舜三代循吏之効惟其務實不務名也爾莊靜不褻而篤求己之學廉直無華而堅爲民之意自去周行屢牧壯郡朝梳夕紀不遺餘力用能害除而利興非善美充實之發耶甫出憲節隨畀藩符進以嫺閣之直維東

梓地鉅望隆疇昔間以衣烏筆橐臨之非偏郡比
布吾實德行爾實政使民被實惠選表有日矣可
國子錄汪之道除諸王宮大小學教授
制
勅具官某朕寤寐雋髦以起治功日輪百執事入
對便朝求其通達如賈誼懇到如陸贄未多見也
爾茹古而涵今弼中而彪外頃敷奏以言慷慨英
發作興天下之勢鼓舞天下之才纒纒有契於心
朕甚竒之楷模河間東平之系陶冶成人小子之
質姑爲朕往起視六合周覽群動朕方思所以訪
爾者可

大理寺丞趙凝除司農寺丞制

勅具官某師行日費千金石城非粟莫守漢大將
軍票騎之出所以必取給於大農也爾居家有孝
謹之行治郡有廉靜之譽立朝有深遠之識甫丞
棘廷又承農扈夫豈輕進爾哉仲季分閩淮襄日
講立武足兵之略一歲錢穀出入使爾與聞則軍
國之調度供億壘篋交應矣且以示獎拔之權輿
可

趙崇濤直祕閣知遂寧府制

勅具官某沂夔萬而陸走穹山複嶺虎兕出沒涉
武信乃趨夷良疇沃壘桑稻彌望坤維樂土也必

填之良吏爾以信厚之質邁往之材行平易之政
將指巴夔灌輸阜通而民不病可謂良矣寓直中
祕殿我巨屏旁制于四郡恩威兼濟辦治無難然
元祐諸賢邦有遺像尚求聞於往行用康保民以
表于蜀可

李鈺差知嘉定府制

勅具官某捷爲古夜郎國漢定西南夷與沈黎俱
置郡而地望負出黎上迨爲潛藩又加重爾璵璠
其質豫章其材故家之最良也試郡于黎疚心邊
瑣所陳便民事宜懇切而詳明知必良于政易鎮
捷爲昭示獎擢體予不忘遠之意懋爾有常吉之
行恩信並著民夷胥安則所至可紀矣可

李良孫知隆慶府李仲熊知紹慶府制

勅具官某等劔門北扼棧道黔陽南控溪洞皆要
藩也亦皆潛藩也守不輕授爾良孫以敏劭之姿
著關決之譽就擁劔麾駕輕車於熟路爾仲熊以
駿邁之器養融顯之望趣縮黔紱發利刃於新研
孟子曰固國不以山谿之險險雖天設必以人固
爾能虔奉吾詔養民也惠使民也義則人心隱然
可恃如金湯往哉毋忽可

劉竑之改知重慶府制

勅具官某蜀有着壽雋直節著於慶元高風振於

嘉定落落乎其不苟合朕聞而賢之爾其季子也
力學而脩潔抱材而謙粹雍容氣度酷似厥考方
需偏壘趣典名藩超等而授人不謂過而喜古渝
之得賢守家法可想也益懋中和之治用昌詩禮
之業可

李景翔和羅賞轉朝議大夫致仕制

勅具官某李悝平糴之法百世可行也居是邦而
習其俗則雖多易辦爾總蜀賦而歸優游家食以
富於才任我糴事年豐價平農固樂市積數踰億
能無勞乎躡升元士之級尚知告老之榮可

陳一薦屯田和羅賞轉承議郎制

勅具官某羊祜墾田於襄陽至有十年之積豈一
手足之力哉爾材高莫府職涖耕屯當危機交急
之秋收平時勸課之効迄充兵廩用濟邊功進升
一級之華益懋方來之績可

歸順周岳補武功郎遙郡刺史淮東兵馬鈐轄制

勅具官某胸山東峙密邇淮浦挈城歸誼爾實倡
之莫非王臣超昇武級仍躋榮於遙刺俾參領於
戎鈐祗服異恩勉殫忠力可

李敏補修武郎制

勅具官某虜情叵測以間爲奇爾戍安豐深察情

僞不爲利誘仍效戰多超授武階用旌知義可

蒲南強落致仕差知茂州制

勅具官某自祚以東北并驩爲大茂其地也六夷
七羗九蠻錯處之俗猶有遺者置守必廉靜爾廉
而介於守靜而恬於進踐敷可紀蜀士共推之詎
容以據鞍矍鑠掛神武之冠耶起之里居往鎮汶
水化浹于襁褓風行于旃毳不待按籌邊之圖而
遐徼莫枕矣其毋徒以遺榮爲高可

楊恢除直寶文閣淮西制置副使兼知黃州制

勅具官某弈莫先於審局布勢取勢多則勝局也
江淮表裏分置制閫亦然爾乘塞於均宅牧於荆
進屯於襄撫機應變之材愈出而不窮維時淮右
風寒最切而齊安據山川之會峻直寶奎參領閫
寄往爲朕守中襄鄂昇揚而立首尾聯絡非取勢
獨多乎江漢之詩曰匪安匪舒淮夷來鋪又曰經
營四方告成于王淮服底寧則四方可經營也內
繕諸關外嚴列戍懷來新氓綏定故境朕方倚重
於汝懋哉可

工部侍郎知建康府陳韓明堂加恩制
勅朕蒐儀先甲歲祀上辛賦思齊之詩慕親方切
稽我將之頌饗帝尤嚴恍三靈之宴娛道百祿之

來下有懷時彥宜錫神釐具官某學擅名儒望高
法從輪囷膽略吞青海於習中磅礴威名碎黑山
於掌上迺瞻明禋之講沆臻熙事之成雖阻清廟
之執遵靡忘宣室之前席爵爰升於蒲壁戶仍衍
於畚圭帝命式于九圍朕既荷受球之寵天威不
違咫尺爾毋忘拜胙之恭懋暢英猷對敷景況可
虞孝先特轉一官授朝奉大夫制
勅具官某蜀關赤白囊交馳茲吐或乘間矯虔為
郡縣害去敗群之羊必良牧爾以長材選拔攝守
閬川芟夷不逞封護善良千里絕桴鼓之警可無
獎乎進階正郎分麾邊徼益厲精白以承可

陳亞卿知德慶府制

勅具官某古康名藩也邈在嶺海之東必習其風
土諳其俗者為之守爾裕於材諳敏於事功自筮
仕至試郡扶胥黃木之間熟知津矣藹勞能之可
紀鬱環韞之未究起家分符往鎮瀧水其為朕布
宣寬大之意簡賦平刑以惠遠民可

牛大年以子病乞祠除直敷文閣主管

建康府崇禧觀制

勅具官某立朝而引去握節而賦歸殆不以富貴
利達入其心者歟爾玉雪其廉明準繩其平直卓
有立於斯世晚繇蜀道入儀郎省步武寢華矣而

出駕四牡列城聳動顧浩然有歸志何耶父母惟其疾之憂天性之愛也爾以子諗朕重違之進班穹閣均佚釐館非朕之不汝以也尚培高風用礪頽俗可

曾治鳳除直徽猷閣知建寧府制

勅具官某閩粵接壤比歲黔首失職相挺而動亦既底定矣推吾德意煥寒飮飢以遂其欲安欲壽之情在賢牧守爾器識邃明材猷通亮所至以最稱宅牧番禺恩信茂著一道晏然沉析建安鉅屏號稱難治其進直奎躔易地填綏之爾知閩之俗與粵近則燮友柔克彊弗友剛克何往非美政哉可

沈安義辟差知宜州制

勅具官某廣右郡二十餘或繚而深控蠻而枕海守慮人器之不相習也故委重於臺閫之辟爾賦材彊敏抗志駿偉貳政長沙綽有佳譽辟函上於公車謂宜方闕守奉詔條以撫遐嶠莫如汝稱往哉毋鄙遠其俗而同其戚休山暘溪獠咸知德意是為舉能其官可

鄧雲特轉武略大夫制

勅具官某功之多者賞必厚爾江右捕盜山陽討虜皆以功受賞崗門鹽城又著奇功信能迪果毅

二〇二八
矣躡進穹級參護戎旅毋玩寵榮而忘賈勇可

留子邁救荒推賞轉朝奉大夫依舊潭

州通判制

勅具官某救荒無定法得其人則政舉爾試邑衡陽再講荒政既脫民於溝瘠又儲粟為先備朕惠養元元之意庶幾下達矣升秩正郎貳政大府益進民庸惟勤惟恭可

王燭轉朝奉郎致仕制

勅具官某官至貞外郎則賞延于世必年勞乃克轉爾飭已無玷莅官有聲方諗疾以少休遽遺榮而長往肆疇前績式進華階燕爾後昆服予異渥可

章謙亨除京西路提舉常平茶鹽公事

制

勅具官某朕選拔四方譽俊布列中外苟當其材用之惟恐不亟縱騁景靡過都歷塊乃見齧膝乘旦之良也爾業履正平材氣駿發能不墜其家聲擢繇轄院趣守壯藩未合竹符趣畀英蕩蓋欲及精銳而用之維京右民力憊而未甦財計屈而未裕出納歛散權之以義而行以仁惟爾之能可

淮東路兵馬鈐轄桑青轉武功大夫制

勅具

于台之役大小三十七戰而城降士用

命也。上功謂爾勇鷙而敢戰，宜受醴賞，峻躋武級，統戎惟揚，報國赤心，更觀來効可。

趙彥覃除直寶謨閣權知廣州兼廣東

路經略安撫制

勅具官某：自唐以來，殿南服者，能使海嶺之陬，既足，旣濡，幾何人？故宅牧必謹，爾嚴於治己而不絕物，切於愛民而不近名。公族之英，吏之良也。起乘蜀傳，畀治節，刀布之利，方興。番禺課帥又輟以往，爲官擇人，奚嫌數易？夫貪泉不能汙夷齊之操，固也。以身爲表，州縣吏聞風皆趨於精白，則遵海而南，斯民安必樂業如中州矣。朕蓋以廉頑立懦，而望汝可。

翰林學士真德秀磨勘轉中大天制

勅用儒無敵，奚拘考績之科？彰德有常，可後懋官之典。矧承暉於蓮炬，盍疏寵於芝綸。具官某：學富而文醇，行方而言正。孟氏舍齊而去，昔豈本心？季子爲魯而來，今維衆望。冠鑾坡而視草，列氈厦以侍言。展也開陳，隱然裨益。雖時行或異於時止，而歲會悉歸於歲成。稽課簿之旣高，陟文階之宜峻。食舊德從上吉也。政資密勿之規，有好爵與爾靡之懋。對便蕃之渥可。

頁容孫改差知順慶府制

乃果山朕潛藩也睠焉西顧未有以慰其父兄子弟思得良二千石以惠之爾材猷之偉事功之敏能稱其家者分符蜀道亦旣鼓柹三峽易文以果地益大寄益重疲氓凋俗元氣未固視其戚休爲朕風披而雨濡之使物物皆生意澤庶乎不下壅矣往哉盡乃心可

李以制除大理寺丞趙師楷太府寺丞
衛洙大理寺簿魏峻太府寺簿制

勅具官某文帝明習國家事首以決獄錢穀爲問仁儉一念之發也朕此意每於分職授任見之以制學業粹明心術平厚勾稽棘讞惟允故進之以丞廷尉洙莊靜有守寬夷無競則擢繇司臬爲之簿師楷宗枝秀穎吏能通暢討論外計蓋熟故來之以丞外府峻風規嫻整志尚簡遠則輟繇儲戎爲之簿獄者生民之司命財者天下之血脉朕甚重焉爾等惟良折獄而不留獄惟正理財而不傷財斯副體仁行儉之意可

朝謁八陵朱復之除軍器監主簿制

勅具官某紹興間燾士儂朝八陵之後今且百年朕祇承聖緒慨想中原未嘗不望嵩洛而灑涕龍庭
倚山歛壻分道展省爾弗憚行駿極之勢氣如故歸陳梗槩若指諸掌克尉坏

復之良勞俾勾稽于戎監習中兵甲
筆力才尚於此培致遠之器可

天水軍教授權知軍州曹友聞特轉承
事郎權知天水軍事制

勅具官某矯矯虎臣在泮猷猷此風無傳久矣爾
奮迹詩書典教邊壘寇至不爲先去之謀見義乃
有必爲之勇迎鋒鏖擊蜀關以寧儒而知兵良用
嘉歎趣升京秩仍進一階就分保障之符增壯金
湯之勢可

吳駟特轉武經郎制

勅具官某毅將中軍漆爲之佐贊籌幙府每難其
材爾從元戎備殫婉畫躋榮一列毋替忠勞可

城固縣尉趙僕特轉儒林郎制

勅具官某尉黃綬卑秩也苟志事功必露囊穎爾
警于邊瑣克贊戎旃進秩旌能益勤勿懈可

武功大夫湯孝信轉右武大夫制

勅繁纓不如多邑弊袴必待有功况品級超越于
拘攣之表具官某抱姿梟勇屢効戰多都梁之役
接近比以祈醲賞雖礙止法亦進橫階予豈爾私
蓋以勸忠勞也懋建舟師之績仰酬異等之恩可

川秦都大茶馬桂如琥除戶部員外郎
制

勅具官某尚書郎非民庸暴白不授矧地官之屬
選高而劇可輕乎爾將漕于變就建帥聞不苛急
以牟利不矯異以干名刀耕火種之民悉安之朕
惟推牧畀節以示獎厲孰與入奏明光之爲密式
端其歸贊我邦計凋窮若何而裕煩冗若何而節
幣輕物重若何而權推此類具言之用觀爾韞可
吳昌裔除太常寺簿鄭逢辰將作監簿

制

勅具官某等朕惟湯執中立賢無方故待天下之
材未嘗以進士世家爲輕重爾昌裔氣明而文富
所謂江漢炳靈曄曄其秀者爾逢辰志立而器整
所謂臺閣之儀不習自成者朕知其皆蘄然而角
陞昌裔于奉常以訂禮登逢辰于匠監以信度塗
轍相望而簿正等臺萊杞梓盡在封植中其競厥
職以對蒐拔可

陳瑄授中奉大夫直敷文閣宮觀制

勅具官某朕親攬八柄進退百辟以成調瑟之化
苟爵於先甲當其材則申命之爾澹乎無慾疑乎
有度藹乎聲稱江右繡斧之行雖未竟乃功亦旣
勞止增秩進職於更化之前今不與易也真祠均
佚善刀而藏時方急材尚觀新硎之發可

中奉大夫趙善璫轉一官回授本土父

不卞贈承事郎制

勅松栢不生於培塿而梧桐生於朝陽士君子可忘其本哉具官某故本生父某秀挹天潢評高月旦是生賢息出繼同支屬進秩以旌能願貤恩而報本爰加愍典用慰孝思顯親揚名之榮衣被九原矣尚歆承之無斁可

中奉大夫趙善璫轉一官回授故本生母梅氏贈孺人制

勅松栢不生於培塿而梧桐生於朝陽士君子可忘其本哉具官某故本生母某氏歸嬪宗磐蔚著聞範是生賢息出繼同支屬進秩以旌能願貤恩而報本爰加愍典用尉孝思顯親揚名之榮衣被九原矣尚歆承之無斁可

中大夫參知政事陳貴誼特授正議大夫守參知政事致仕制

勅湏股肱而治甫新萬化之更乞骸骨而歸俄惜一賢之老晉加異數渙播明綏具官某寬博而川涵凝重而山立道貫六學足以羽翼乎聖傳文成一家足以經緯乎國典蚤華塗之徧歷亟邇列之延登補袞於有闕之時而胥訓居多改弦於不調之後而同寅更力允天民之先覺蔚王佐之全材况休然而有容且澹乎而無慾宜其俾艾胡爾

榮維楫未施朕方念乘航之勢輻輪俱壯爾乃爲
枕駕之圖睠委倚之素深惜訐謨之未究趣升峻
秩仍拓真畬九老自娛孰與繪樂天之社五湖莫
返尚思鑄范蠡之金可

陳章特授中大夫致仕制

勅具官某幼學而壯行者在所立生榮而死哀者
在所遇爾制行寬夷莅事明練荐更共理之寄民
熙於田野士競於庠序蔽芾猶未拜也方祝釐而
自適遽謝事以長逝進躋崇秩用荅宿勞朕之待
臣下可謂有恩矣營魂如存歆此祿典可

僞觀察副使顏仲明僞都總領王逸僞

徵仕郎化平縣令胡士元僞徵仕郎單
公履僞明威將軍鄭彥僞將仕郎尚書
戶部任嘉言僞都總領亢志忠僞安平
都尉張林僞宣武將軍安居信僞明威
將軍晉德僞武節將軍同進僞同知號
州軍州事聞鈞僞徵仕郎王采苓僞登
科人尚書令史朝列大夫陳紀並補承
信郎僞朝列大夫郝士特僞都尉劉儀
僞昭毅大將軍楊全僞定遠大將軍郭
春並補承節郎僞光祿大夫張俊特補
忠靖郎制

勅具官某等王者大一統際天所覆孰非吾臣爾
等效官外域歸誼中朝授之右階拔于左衽其相
與竭忠以報上可

故正議大夫守參知政事致仕陳貴誼
特贈少保資政殿大學士制

勅抗章太紫之北歸志方新占象尾箕之東遊魂
已遠迺睦謨明弼諧之韞未究輔相彌縫之功茂
錫恩徽誕敷命綽具官某學根乎正大氣備乎中
和德盛禮恭謙九三君子之美義方敬直坤六二
大臣之風自儀禁路之華趣踐政塗之重了無緇
磷具罄猷爲欲仁而仁斯至則無念非公不言而

言必中則有謀斯斷屬更大化共振頽綱三千惟
一心正賴丞徒之助五十不稱天遽驚隆棟之摧
惟慶曆之仲淹暨元祐之蘇轍用俱不盡命尚奚
尤萬金之藥雖施何嗟及矣十漸之屏猶在如將
見之欲紓殄瘁之悲庸侈褒崇之典位外朝之列
棘班祕殿之鴻名噫亮天功而弼一人詎止書棺
之寵質鬼神而俟百世永爲銘鼎之光極而生死
之榮歆我始終之遇可

金部郎中黃壯猷除直祕閣權知紹興
府兼浙東安撫制

勅具官某會稽東南鉅鎮中興百年之馮翊朕

豐沛也吏治剛則覲柔則坏故牧守以識體爲良
何軫姿融明慮事精密間者攬轡左淵政得寬猛
之中朕深知之輟自望郎出殿帥闔中祕寓直擁
高牙大纛而東豈特以華舊部之觀哉書曰以厥
庶民暨厥臣達大家又曰康濟小民率自中德禮
刑政導齊有序而上下相安於和樂體斯得矣重
楮幣而輕和買抑思乃言之踐可

彭協贈承信郎制

勅具官某勇士不忘喪其元義重於生也武休之
役爾挺戈陷陣効死封疆而賊氣奪可謂勇矣荐
卅武級仍錄孤兒英魂有知歆戴無憾可

歸順人王青劉天山米興王庭李忠齊
門清劉全魏師愈王瑜李裕范天保並
補保義郎制

勅具官某等王者大一統際天所覆孰非吾臣爾
等效官外域歸命中朝授之右階拔于左衽其相
與竭忠以報上可

